

dum sit de eo, quod pag. 25. subjungit: *Hi omnes, inquit, & alii passim mystici auctores & Theologia mystica scriptores cognitionem quandam Dei prædicant, quæ absque verbis quibuscunque habeatur, per internum quendam Dei, rerumque divinarum gustum & contactum sensibilem, in animis & cordibus eorum, qui debitum puritatis & sanctitatis statum, ad talem cognitionis gradum requisitum sunt assecuti.* Sane si qui inter mysticos sequiorum seculorum, a sacra doctrina abeuntes revera statuerint, se, aut alios, ad intuitivam Dei in hac vita cognitionem pervenisse, non est, cur illos moremur: ac videri de illis potest *Maximil. Sandeus Lib. III. de Theol. varia Commentar. 40. ad 44.* Sed postquam certum est, priores illos de quibus diximus, adeo clare negare & impugnare sententiam de visione Dei facili seu intuitiva in hac vita; dicendum erit, eosdem, quando sibi constant, equidem cognitionem Dei absque verbis, gustum etiam aliquem & contactum quendam sensibilem, non tamen intuitivam Dei in hac vita visionem statuere.

LVIII. Et profecto fideles, qui ex Scripturæ verbis veram de Deo ac rebus divinis, præsertim beneficiis spiritualibus atque admirandis sententiam didicerunt; eique doctrinæ, per supernaturalem Spiritus Sancti cum illa conjunctam operationem, assensum supernaturalem commodarunt: stante hac notitia & assensu, retentisque adeo in mente sua speciebus intelligibilibus, deinde non tam ad verba, quibus in apprehensionem rerum illam sublimium deducti fuerint, respiciant: sed his suppositis, jam porro res ipsas, prout intellectui per species intelligibiles sunt exhibitæ, meditentur: dumque a rerum carnalium aut terrenarum desideriis actualibus abstinent, & concupiscentiam refrenatam habent; jam in profundam rerum spiritualium contemplationem & admirationem sese demittunt, & quæ in Scripturis generaliter seu indeterminate ad certum individuum continentur; ipsi sub istis ad se descendentes, sensum aliquem spirituales bonitatis divinæ percipiunt, quo animus suaviter afficiatur & acquiescat. Atqui hoc omne fit dependenter a Scripturis; neque excludit, sed im-

F

portat